



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tiryimym@aolima



tir yimym

TAPAK 8

Jail nung puokiyonga ni maneni ola adoktsü: Rahul Gandhi

Bayern Munich-i caoch Julian mapa nungi anentsür Tichel shim



VOL. XX NO. 163 (ADOK 163)

DIMAPUR

AMUNGNÜ (SUNDAY)

METSÜREMI (MARCH) 26, 2023

₹ 5.00

Smart City ajanga smart citizens nungdaker: Zhaleo Rio KSDLC-i mapatong 32 nungi 20 renemogo

Kohima, March 25, 2023 (TYO): Kohima Smart City Development Limited (KSCDL)-i Smart City project tenzükter küm tenetbuba nung ayaoka iogo ta Urban Development and Municipal Affairs Advisor, Zhaleo Rio-i ashi.

Asenoki 'smart amenities' amshiba dang masü saka 'smart citizens' akümtsüla ta pai ashi.

KSCDL indang 7 buba Foundation Day sentong nung Zhaleo-i "smart city projects ya sensotem asoshi teyari aser jilatam nung sensakertem asoshi nungdakba facilities agütsütsü atema lir" ta ashi.

Smart city ka nung public atema infrastructure, amenities aser facilities shitak alitsüla saka iba denji külemi 'smart citizens' alitsü nungdaker, ta paisa ashi.

KSCDL-i Smart City project tenzükter küm tenet tashi inyaka arudang mapa tajung inyakba atema tenüngsang agütsür ta Zhaleo-isa metetdaksü.

"Mapatong inyaktsüba mapang ya June nung tembangtsü akok anungji Kohima Municipal Council, wards aser line departments-i nübertem dang civic sense, sanitation & hygiene indang tesayubatem agütsütsü mepishir" ta paisa ashi.

"Kohima Smart City- March 2017 nungi tenzükter tang tashi nung mission alizüng tonga inyaka arudar aser sorkar aser sensotem teyari ajanga maneni maparen inyaker" ta KSCDL indang Chief Executive Officer Kezha Theunuo-i ashi.

Special Purpose Vehicle (SPV) ajanga agizükba ama KSCDL-i projects 32 inyaktsü tenzük aser item asoshi Rs. 550 crore lemezüksü.

Sen ya funding pattern 90:10 tangatetba nung lir aser ibaji Ministry of House and Urban Affairs (MoHUA) nungi Centre lemezükba Rs. 500 crore aser State share Rs. 50 crore lir, ta pai ashi.

(Maneni tapak 8 nung...)

Assam, Nagaland & Manipur nung 'disturbed areas' aika agiener



Guwahati, March 25, 2023 (Agencies): Honibarnü Centre-i Nagaland, Assam aser Manipur nung Armed Forces (Special Powers) Act (AFSPA) kübok disturbed areas ajemogo. Iba ya April 1, 2023 nungi mapa tenzüksü.

Northeast nung security tensa tajungba akümba ajanga iba telemtetba agi, ta Union Home Minister Amit Shah-i ashi.

Tesüiba küm pezü tsüngda Northeastern state tem nung peace accords aika tenzükogo aser iba ajanga telungpur telok aika temai adokogo, ta pai metetdaksü.

2014 nungi tenzükter telungpur telok balala nungi züngsem 7,000 shi ka temai adokogo, ta Ministry of Home Affairs (MHA)-ia metetdaksü.

MHA-i tesüiba küm pezü tsüngda agreements aika nung

sign süogo aser iba ajanga küm aika Northeastern region nung khuret ajurua aliba koktetogo ta parnokisa ashi.

Security tensa tajungba akümba ajanga 2015 küm Tripura nung AFSPA agien aser 2018 küm Meghalaya nunga agien ta MHA sangdong nung ashi.

1990 nungi Assam state ajungalen disturbed areas liasü. Ajisiaka security tensa tajungba akümba ajanga 1 April 2022 nungi district 9 aser sub-division ka dak alaka AFSPA agienogo. Ano April 1, 2023 nungibo district 9 nung dang alitsü ta MHA-i metetdaksü.

2004 nungi Manipur nunga AFSPA benok saka April 1, 2022 nungi Centre sorkari district 6 nung police station areas 15 nungi agien aser April 1, 2023 nungi police stations 4 nung disturbed area agientsü, ta parnokisa ashi.

Manipur nung district 7 nung police stations 19 nungi disturbed area agienogo, ta MHA-isa shisem. Nagaland nung 1995 nungi state ajanga disturbed areas liasü saka April 1, 2022 nungi district 7 nung police stations 15 nungi disturbed area agienogo, ta MHA-i ashi.

Nagaland nung April 1, 2023 nungi police stations 3 nung AFSPA kübok disturbed area agientsü. Item ya züngsema Nagaland nung district 8 nung police stations 18 nungi disturbed area agientsü, ta parnokisa metetdaksü.

"Prime Minister Narendra Modi-i Northeast nung alirtem asoshi yimjung aser temelenshi tajung bentsür aruba atema pelar" ta Union Home Minister Amit Shah-i ashi.

2014 küm den medemdangra 2022 nung telungpur maparen 76% ajema aküm. Kasa mapang sepaitem asüba 90% aser civilian asüba 97% ajemogo, ta Ministry of Home Affairs (MHA)-i metetdaksü.



FOR A SUSTAINABLE AND ECONOMICALLY VIABLE AGRICULTURE IN NAGALAND

AGRICULTURE IS ONE OF THE FOCUS AREAS OF THE B20 MEET AT KOHIMA

Nagaland
B20 BUSINESS MEET
5TH APRIL 2023
KOHIMA

Smagra Shiksha-i ayongzüka Jorhat semdang



NEIST Conference Hall nung CSIR -NEIST DIRECTOR aser NEIST faculty temi kaketshirtem, tesayurtem aser SMA ketdangsürtem den sensak asema nung angur.

Dimapur, Metsüremi/March 25 (TYO): Smagra Shiksha, Nagaland-i ayongzüka Secondary kaketshirtem March 23 nungi 25 tashi Study Trip ka anirogo. Iba sentong ayongzüka agiba nukjijongji, kaketshirtem angazüksü tejangraba kümdaktsütsü, tesem tasen bushiteta aotsü aser jangrademdaktsütsü atema aser classroom adena orr enquiry based learning ajungkettsü

asoshi liasü. Iba team nung state kübok tesem balala nung secondary kaketshir 33 aser tesayur 11 aser State Mission office nungi ketdangsür ana densema liasü. Parnoki CSIR-North East Institute of Science and Technology (NEIST), Jorhat semdanga liasü.

Mezüngbuba anogo NEIST Director Dr. G. Narahari Sastry den pa kübok külem

tenzükertemi, kaketshirtem den skill development aser scientific methods balala dak sendakba nung sensaksem sentong ka ayongzüka agi. Iba sensaksem sentong ajanga kaketshirtem taküm nung scientific yimayimpong ka bendenloksü atema ajungmeso aser nukjijong ka yur iba dak rangloker inyaktsü ajungmeso liasü. Kasa mapang nung kaketshirtemi campus telung nung laboratories balala semdanga liasü.

Tanabuba anogo team-i Majuli asetkong semdang, koba alima nung ayong asetkong tulutiba lir. Iba sülen team-i Jorhat nung Science City aser Planetarium semdang, kong kaketshirtem nema shilem agidakja tangazükba agüja liasü.

DGC nung Soft Skills training tembangogo

Dimapur, Metsüremi/March 25 (TYO): Anogo 30, ghonda 90 Soft skills training sentong koba February 6 nü tenzüka liasü iba sentong ya March 24 nü takok ngua tembangogo.

Mezüngbuba batch nung kaketshir 65-i (BA/B.COM 6thSem) Soft Skills training takok ngua agiogo. Training sentong nung kaketshirtem nem

Value Education dak sendakba nung tangazükba agütsü koba ajanga taküm nung lenla ajak nung teyari agütsür aser nisung ka tajungba küma melenshitsu.

Nagaland sorkari Bengaluru nung amendaker aliba NGO, UNNATI den tenangzüktepba ka yangluogo aser Chief secretary J Alam-i 2023 küm January 12 nü Kohima nung iba

sentong ya tenzüka liasü.

Temetetsü kaji Dimapur Govt. College ya National Skills Development Corporation (NSDC) kübok SkilsHub ka ama agizüker lir aser college Skill Development Committee-i iba amala sentong balala ayongzüka kaketshirtem nem tangazükba balala agütsütsü asoshi shilem tajung agia arudar.

Mezüngbuba robotics sentong Kohima nung agiogo

Kohima, Metsüremi/March 25 (TYO): Nagaland nung amendaker aliba robotics organization Nagabots aser Department of Industries & Commerce na longjemer tanü Nagaland nung mezüngbuba robotics event 'Techmorphosis - Innovation in motion' sentong 'Startup Nagaland' omen nung ajemdaker Kohima Science College, Jotsoma nung agiogo.

Nagaland nung technology aser innovation terenlok ajungkettsü aser kaketshirtem aser tejangrartemi parnok sempet sayatsü atema sabang ka agütsütsü nukjijong nung iba sentong ayongzüka agiogo, ta Director NAGABOTS, Kikrukhrilie Khezhe-i ashi.

NAGABOTS nukjijongji Nagaland nung taruba putu technology lenirtem ajungmesotsü aser parnok nem tashi agütsütsü atema lir aser iba sentong ya iba nukjijong ataloktsü atema tetemsü sabang ka lir, ta pai ashi.

Alakteta jaoker ama sentong nung o jembiba mapang Investment & Development Authority of Nagaland (IDAN) Nagaland, Joint Secretary, Renny Wilfred-i, sentong nung shilem agirtem dang, robot amshiba ajanga taküm libaliro tezübaba kümdaktsütsü asoshi kechi inyak nung ajungtsü aji bilemdanga inyaksangshitsü ajungshi.

Iba ya mapa tajungba angutsü atema hadir ka asütsüla ta pai ashiba den iba sabang ya lanurtem mulungsentsü saksalema kümdaktsütsü aser takoktsü kechi lir iba alema



bilemtsü asoshi amshitsüla, ta shisem.

Team Leader Startup Nagaland and Assistant Director (Tech) Department of Industries & Commerce, Keneirienuo K. Theunuo-ia iba sentong nung o tatsüka jembiba mapang ashiba agi, lanurtem mapa bushirtem masü saka mapa adokdaksür küdaktsütsü asoshi startup company tem takok ngua yangerdaktsütsü atema innovation aser creativity sobaliba ka tentedaktsütsü nukjijong nung iba sentong ayongzüka agir, ta ashi.

India ya robotics aser Artificial Intelligence (AI) renloka aoba mapang robot tajungtem yagluba tesem ka kümogo ta lai ashiba den Kempa ya India nung robot tajungtiba rongnung ka lir aser iba yagi Kempgowda International Airport, Bengaluru nung bendanger densema passenger lakh aika ajurur, ta ashi.

India nung KP-Bot ta nungja agütsür mezüngbuba RoboCop 2019 küm Kerala nung amshi tenzüker aser iba yagi tesemdangertem agizüka parnok aotsüba tesemtem

indang tetuyuba agütsür, ta lai ashi.

Laisa, sentong nung shilem agirtem dang Nagaland nung tebilemtsü alibatem repringdangtsü aser parnok sempet aser tasa ajanga item ya bentetsü merangtsüla ta ashi.

Techmorphosis sentong nung institution 14 nungi nisung 127-i shilem agia liasü.

Dimapur aser Kohima kübok school balala nungi aser robotics nung sendaka alirtemi technology balala nung parnok shisatsü aser sempettem lemsatepa liasü.

Iba sentong atema Department of Employment, Skill Development and Entrepreneurship, Government of Nagaland aser UCO Bank-ia teyari agüja liasü, koba Nagaland nung technological education aser innovation ajungkettsü atema merangdangba ka lir.

Tetoktepba balala nung takok angurtem:

RoboChamp: 1st- John Pradia (Stella Hr. Sec. School, Kohima), 2nd- Imtiakum Chang (St. John School, Diphupar-B), 3rd- Munuyi Nakhro (Minister's

Nagaland Excise Deptt senden amen

Dimapur, Metsüremi/March 25 (TYO): March 25 nü Advisor for Excise, Labour, Employment & Skill Development Moatoshi Longkumer den Excise Department ketdangsürtem metetpela sentong ka Commissioner of Excise conference hall nung menogo.

Sentong lenir Chanlei Angh DC (Hq)-i, Advisor aser Department kübok telen balala nung ketdangsürtem ajak pelashishia agizüka liasü. Commissioner of Excise H. Atokhe Aye NCS-i lokti pela agizükba o jembiba mapang Department atema süoki ia bilema mazüngi liaka mapang agüja iba senden nung shilem agiba atema Advisor dang kanga pelaba lemsatepa liasü.

Paisa, Department ya yimya agi sentoka dang toktsür, saka lokti nung temelenshi tajung bener arutsütsü atema department dak tashi lir ta ashi.

Kasa mapang nung Commissioner & Secretary, Govt of Nagaland, Excise Deptt, Kevekha Kevin Zehol, NCS-i, Advisor nem tenüngsang agütsüba den

infrastructure terenlok, Checkgate activation aser Narcotics dak sendakba ken o balala atema department-i benoker alibatem metetdaksü aser Advisor lenisüba nung item maparentem takok ngua inyakyonga aotsü imlaba lemsatepa liasü.

Kasa mapang nung Advisor Moatoshi Longkumer-i, longjemer inyaktsü atema Excise department kübok tenzükertem ajungshiba den parnok Team Leader ama pa agizüktsü mepeshia liasü. Paisa, department jenjang mejungi aliba ngua sasaba lemsatepaba den inaykim nung temelenshi bener arutsü aser pai takokba tashi teyari agütsütsü nangzüka liasü.

Maneni pai lokti nung temesepeba mozü kanga bulua amshitsüsa lenmang sadema lapoka aliba indang süoki ia bilemba lemsatep. NLTP Act dak sendakba nung pai benoktsüsa kümra benoktsü ta ashiba den personnel tem dang parnok temsüa lir ta kuli agütsütsü ajungshi kechiyong iba Act kübok department nem tashi agüja lir, ta shisem.

Molier (Hope Academy, Dimapur)

Basic Electronics: 1st- Ovungjan Y Ovung (St. John School, Diphupar-B), 2nd- Akummen aser Imnasanen Imsong (Stella HSS, Kohima), 3rd- Janglungpu Longmei (St. Mary's Cathedral HSS, Kohima)

Best design- Rakovilu (St. John School, Diphupar-B) aser Best presentation- Sangzui H Lam (St. Mary's Cathedral HSS, Kohima)

Arduino: 1st- Octonu Chishi, Ngukivito H Rochill aser Toshizungla Jamir (Hope Academy, Dimapur), 2nd- Ongpangsenbo LKR (Hope Academy, Dimapur), 3rd- K. Supie, Gwakenye Keppen aser Kekhriehazo Nakhro (Stella HSS, Kohima)

Best Presentation- Zaiyigum Zeliang (Holotoli School, Dimapur) aser Best Design- Rikok Lamliu aser Thejasevor Tseikha (Northfield School, Kohima)

Innovation Challenge: 1st- Er. Rishav Sethi (Arham - An Intra- Department), 2nd- Kevichüsie Thorie, Vekuvolu Nyekha, Atheli K Achumi aser Kekhrieneise Chusi (Guardian Angel Project) (Stella Hr. Sec. School, Kohima) 3rd- Kuzo Kezo aser Rosan Ram (Army Cantonment Smart City) (St. Mary's Cathedral HSS, Kohima)

Mini Hackathon (Capture the Flag): Winners- Nivevi, Manyong aser Pewoka (Fernwood HSS, Kohima); Best Team Work- Abangmaithrong aser Negusatuo (Northfield School, Kohima).

Hill Baptist HSS, Kohima).

Best Design- Chentimoa Amri (Hope Academy, Dimapur) aser Best Presentation- Kunuvi Khamo (Minister's Hill Baptist Hr. Sec. School, Kohima)

Scratch: 1st- Rathailung Felix Panmei (St. Mary's Cathedral HSS, Kohima), 2nd- Chumrenthung Humtsoe (St. Mary's Cathedral Hr. Sec. School, Kohima), 3rd- Zhoto Theyo (Minister's Hill Baptist Hr. Sec. School, Kohima)

Best design- Nukuzo Ringa (Minister's Hill Baptist Hr. Sec. School, Kohima) aser Best presentation- Cuvelo Swuro (Minister's Hill Baptist Hr. Sec. School, Kohima)

App Inventor: 1st- Donen Chang Solo (Northfield School, Kohima), 2nd - Rishir Molier and Keso Thong Seb (Northfield School, Kohima), 3rd - Nokhuseto Kirha (St. Mary's Cathedral Hr. Sec. School, Kohima)

Best design- Ngarenso W Sangma & Rakuyiu Damian Basena (St. Mary's Cathedral Hr. Sec. School, Kohima) aser Best presentation- Judanger

Party temi India nunger oshi ajungkettsütsü atema meinyaker: PM



March 25, 2023 nü Karnataka kübok Chikkaballapura district nung Sri Madhusudan Sai Institute of Medical Sciences & Research (SMSIMSR) semzükba sentong nung Karnataka Chief Minister, Basavaraj Bommai-i Ato kilonser, Narendra Modi agizükdang tangokba noksa nung angur.

Bengaluru, Metsüremi/ March 25 (Agencies): Honibarnü Ato kilonser, Narendra Modi-i, yimtenren party temi India nunger oshi ajungkettsütsü atema peria meinyaker, ta aitsü.

Yimtenren party temi yimtsüngtem nungi kaketshirtem, sensakertem aser backward class kibongtem nungi kaketshirtem doctor mesüra engineer mekümdaktsüner, ta pai ashi.

Yimtsüngtem aser sensaker kibongtem nungi lanurtemi medical tsütsü maongka junga manguba dak sendakba nung Modi-i, pai aniba BJP sorkari item tebilemtsü onük meteta dang lir, ibayongji sorkari Kannada oshi densema India nunger oshi balala ajanga medical shisaliok angutsü atema maongka agütsü, ta metetdaktsü.

"Medical profession nung tayongzükba ka lir, ta ni nenok dang ashir. Iba tayongzükbaaji ajanga yimtsüngtem nungi lanurtem aser sensaker den

backward classes kibongtem nungi lanurtem doctor mekümteter," ta Ato kilonseri ashi.

Honibarnü Karnataka kübok Chikkaballapura district nung Sri Madhusudan Sai Institute of Medical Sciences and Research (SMSIMSR) semzüktsüba sülen lokti den jembidang Modi-i, "Party kari yimtenren tsütsü tajangzük angutsü atema oshi nung ajemdaker asayar, ajisüaka atangji nungbo parnoki oshi balala ajungkettsütsü atema meinyaker," ta ashi.

"Kannada oshi ya takar oshi ka lir. Iba oshi ajanga linük akhümket ajungkettsür. Tamalen aliba sorkartemi Kannada oshi nunga medical, engineering aser technical education agütsütsü atema meinyak," ta pai ashi.

"Item party tem jagi yimtsüngtem, sensaker aser backward class kibongtem nungi jala-jabasotem doctor mesüra engineer mekümdaktsünü, ajisüaka ozü

sorkari sensakertem jenjang ajungkettsütsü atema inyaka Kannada oshi densema India nunger oshi balala nung medical education angutsü atema maongka agütsü," ta pai ashi.

SMSIMSR semzükba sentong nungji Karnataka Chief Minister Basavaraj Bommai, state Health Minister K Sudhakar aser Madhusudan Sai nunger densema party lenir aika liasü.

"Joko mapang talangka nungi linük nung iba ama politics ji liasü; sensakertemji vote bank ama dang züngshi. Ajisüaka BJP sorkar atemabo sensakertem tenzüksüji tongtibangba mapa. Onoki sensakertem aser middle class nüburtem health aser taküm jenjang tajungba akümtsü atema inyaker. Mozü jenjang dalang agi agütsütsü atema onoki 'Janoushadi Kendras' lapoktsüogo," ta pai ashi.

SMSIMSR ya angati medical college & hospital ka lir. Iba hospital nung medical education tajung den treatment angati agütsütsü.

Ochimashi ken onung CBI-i Bihar DyCM Tejashwi dang asüngdangya

New Delhi, March 25 (Agencies): Mapa melen ali agiba ochimashi ken o dak sendakba nung asüngdangyatsü atema Honibarnü Bihar deputy chief minister aser Rashtriya Janata Dal (RJD) lenir, Tejashwi Yadav Central Bureau of Investigation (CBI) matsüngdangi ao.

Kasa ken o nung RJD MP aser Tejashwi'er aianu, Misa Bharti danga ED-i asüngdangyadar.

CBI office-i apusoa aoba

mapang osangbenertem den jembidang Tejashwi-i, "Onoki mapang ajak nung agency balala den amalitepa aruogo, ajisüaka tanü linük tensa nung temeden atema raratsü kanga tasak kümogo, ajisüaka onoki iba anema raratsü telemteba agiogo aser onoki takok angutsü," ta metetdaktsü.

Honibarnü anüngdang 11:00 ako meta Tejashwi CBI office tonga aoba sülen CBI-i pa dang ghonda pezü asüngdangya. Iba sülen nikongdang 3:00 ako meta

pa South Delhi-i oa la kinüngtsü (mashisa) amongba hospital-i oa la semdanga liasü.

Taoba hopta CBI-i Delhi High Court dang, tan ita nungbosa parnoki Tejashwi maputsü, ta nangzükba sülen ang Tejashwi-i CBI matsüngdangi aotsü melunga liasü.

Kasa ken o nung March 15 nü special CBI court kati Tejashwi Yadav tebu aser taoba mapang Railway Minister, Lalu Prasad den tetsü, Rabri Devi na nem bail agütsüogo.



Thiruvananthapuram, March 25, 2023: Kerala yimtiba, Thiruvananthapuram nung bendanger raliwalirtemi 'Pongal' benjung nung shilem agiba noksa nung angur.

India nung ano Covid kanga putetdar

New Delhi, March 25 (Agencies): India linük nung ano coronavirus wara prok tenzuka tesüiba ghonda 24 tsüngda nisung 1,590 dak coronavirus putetogo, aser ibaji tesüiba anogo 146 tsüngda anogo ka kija nung teimtiba putetba lir, ta Health Ministry-i metetdaktsü.

Ibaji densemabo tang linük nung coronavirus agi teshirangdakpur 8,601 kümogo. Tawa coronavirus kanga prokba ya Omicron strain indang XBB.1.16 subvariant lir, aser ibaji ajanga hospital tem asentenshir kümümshidar.

Tang tashi nung India nung nisung ajak senteper 4,47,02,257 dak coronavirus putetogo. India nung H3N2 yimra agi shirangtepba mapang nung coronavirus-a kanga putetdar.

Tawa coronavirus teimtiba putetba state tem rongnung Maharashtra, Telangana,

Gujarat aser Delhi densema lir aser item state ajak nung XBB.1.16 subvariant putetogo.

Tesüiba ghonda 24 nunga coronavirus agi nisung 6 süogo aser ibaji densemabo linük nung iba tashidak agi asürtem ajak senteper 5,30,824 jungogo.

Tang linük nung anogo shia coronavirus positive putetba shilem 1.33 kümogo aser hopta shia positive putetba shilem-a 1.23 kümogo.

Tan hopta tetenzüklen Ato kilonser, Narendra Modi leniba nung senden mena coronavirus tensa asadanga liasü. Senden nungji Modi-i hospital nung shirangertem, health professionals aser health workers-i mask agiba densema wara anema telatetbatem benschitsü ajungshi.

Paisa teintet sensotem aser co-morbidities keta alirtem dang lokti aliba tesemi aodang mask agitsü ajungshia liasü.

Jail nung puokyonga ni maneni ola adoktsü: Rahul Gandhi



March 25, 2023 nü New Delhi nung Congress lenir, Rahul Gandhi-i osangbenertem den jembidang tangokba noksa nung angur.

New Delhi, March 25 (Agencies): Congress lenir, Rahul Gandhi Lok Sabha nungi anentsüba sülen anogo ka lir Honibarnü mezüng osangbenertem den jembidang pai, pa MP nungi anentsüyonga mesüra jail nung puok yonga pa ola menembangtsütettsü, ta ashi.

Brihostibarnü Surat nung aliba court kati tenüng menüksüba ken o ka nung Rahul Gandhi aitsüba sülen anogo ka lir pa Lok Sabha MP nungi anentsüogo.

Kasa ken o nung court-i pa küm ana tepuokdak ayutsü obendang agütsü.

2019 küm April ita nung Karnataka nung Lok Sabha election nüboyim sentong ka nung jembidang Rahul Gandhi-i, kechiba auer tenüng ajak nung Modi densema lir, ta jembiba sülen Surat West nungi BJP MLA, Purnesh Modi-i Rahul Gandhi anema tenüng menüksüba ken o benoka liasü.

Ajisüaka court-i Gandhi nem bail agütsüogo aser temaba court ka nung temepishiba ken benoktsü atema pa nem maongka agüja obendangji anogo 30 agiena atar.

Rahul Gandhi ya Kerala kübok Wayanad nungi Lok Sabha MP liasü.

Honibarnü osangbenertem senden nung jembidang Rahul Gandhi-i, "Linük nung democracy amaker, ta ni aiben jembia aruogo. Anogo shia item ama tatishitsüji asenoki ngudar. Ni Parliament nung Ato kilonser Modi o Adani na tsüngda tesendaktep atema tasüngdangba agüja liasü," ta ashi.

"Ni Parliament nung jembiba onüktem agien, tesülen ni shidi ajanga Lok Sabha Speaker nem telangzüba tejangja agütsü. Minister kari ni anema tiyazü jembia, ni bendang linüktem dang nungi teyari mashi, ta tai tongloksü. Ajisüaka ni yamaji meinyak," ta paisa metetdaktsü.

Adani-Hindenburg onük dak sendakba nung Rahul-i, pai maneni Ato kilonser aser Gautam Adani na tsüngda tesendaktep atema tasüngdangba akatsü, ta metetdaktsü.

"Ni Adani indang tasüngdangba ka dang asüngdang. Ni maneni tasüngdangba akatsü aser India nung democracy atema raratsü," ta pai metetdaktsü.

Rahul-isa, "Ni Gandhi lir aser Savarkar masü, aser Gandhis-i tatok memeshir," ta ashi.



TIR YIMYIM YIMOBILEM (EDITORIAL)

DIMAPUR

AMUNGNÜ,

METSÜREMI 26, 2023

Nenok den Tsüngrem lir

Asenok dak Tsüngrem tanüla aser tashi aliba agi aser asenok dak temeim aser teimla aliba agi, tangar kin ter sangeri asenok bushia aruagi, "onoka nenok den odi, kechiyong nenok den Tsüngrem lir ta onoki angashiogo," ta ashitsüsa asenok litetka asünunga koda jangratemtsü aser koda nümadanga Tsüngrem aser nisung asoshi mapa tajung inyaka aliba putu ka süla ta melia alir amai bilema aiter. Aji oda, kenü kodang Yisu Khrista tanaben alimai aruagi par nüboritem anidena Yirusalem nung Pa yimli amenoka yimsü asü tenzükdir, idangji Yihuda nungertem Tsüngrem yimli nung sentsüwangshia alibaji tangar kin tersangeri angashia, parnok Yirusalem bushia aruagi, "Yihuda nunger ka teben nung amer, onoka nü den arudi, kechiyong nü den Tsüngrem dena lir ta anoki angashiogo," ta ashitsüsa ta Zakaria tapu 8 tekong 23 nung shia aliba asenoki angur. Atangji, iba Lai tekong nung aliba shin o ya Yisu Khrista yimli alima nung amenoker ataloktsüba indang Zakaria ainker den Tsüngremi jembiba indang ashir ta Laishirtemi ratetter. Ajsüaka, tanü tendaka asenok Yisu temeim agi kümzükertem asoshia tangari asenok dang yamaji ashitsüsa asenok tamang aser taküm libaliro agi tongteta alitsübaji kanga tongtibang lir. Yisui ashi ama, asenok Pa dak amangertem asoshibo tanüa asenok ya Tsüngrem yimli nung alir ta Luke 17: 21 nung shia aliba asenoki angur. Aji kodang asenoki jungjunga bilemdangdir, asenok Tsüngrem yimli nung alirtem o malirtem na tetsüngdaji metetmeteta aser reprangtetreprangteta alitsü tim. Aji oda, asenok Tsüngremi yimli nung alirtem dak Tsüngrem tanüla tashi, temoatsü aser temeim lir ta tangari angashia aser reprangteta, asenok dangia tangar kin tersanger raktepa arua asen denang külemi odi, mesüra asenok den külemi inyakdi mesüra asenok alidakang lidi ta ashitsüsa asenok alitsübaji Tsüngrem sentong aser taginübaji lir. Idangjiang asenok ayaba, tzüraba aser timtemba mapangji pelatepba benjong mapang akümstsü ta kasa Zakaria tapu nung shia aliba asenoki angutsü. Tanü kodang asenoki iba Lai tekongtem ya asen kin aser asen taküm kibong den medemdangdir Tsüngrem tsüngdang taaktsüka medemdangtettsü. Tangbo tangari asen dak Tsüngrem nungi anguba tajung aliba ngur asen den külemi aotsü, külemi inyaktsü aser külemi alitsü tejangraba aser taginüba nung bushia arutsü melen, aseni inyakba mapa tamajungtem ngua asenok den lia aliba purtemia dena asenok dang, "onokbo balaka odi, nenok denbo onoki mouner, kechiyong nenok den Tsüngrem malia ta onoki metetogo," ta ashiba mapang tamajung ka nung asenok lidagi ta asenoki angatettsü. Atangji, Abraham Lincoln-i ashi ama, asenok mejungaka Tsüngremibo asenok medoktsüi asenok den alitsüa akok, saka asenok asoshi tongtibangbaji asenok Tsüngrem den lir mali ta asübaji lir. Tang yabo Tsüngrem temeim asenok tonga aruagi Tsüngrem yimli nung lidaktsür ser nung asenok taküm libaliro mapatem agi Tsüngrem yimli nung alir memesük kümogo. Atangji, memenudang ibai asenok asoshi Tsüngrem bushitsü nüngdakba mapang lir. Aji oda, bendang ternati asenok den Tsüngrem lir ta lilang nungia dena angashitsüsa asenok Tsüngrem den mali tashi asenok Khristan-a ta asütsübaji tenüng agidang agütsü. Tenüng agi Khristan asü tashi asenok tenzükba amajok aser amangbajia tetezü maka, anungji asenok ya shinga asoshia teyari aser teimla angudak masütsü. Asenok Khristan-bo Khristan saka Tsüngrem asenok den madenba Khristanji Khristan masü. Itemjibo tangari nükshia teimla tulu nung bushia arutsü melen temenütsüang menütsütsü aser tajaa majatsü. Aji oda, tangari asenok den Tsüngrem lir ta angashia bushia aruba tenzükder aser tamangertemji asenok asü? Mesüra shingaia asenok denbo Tsüngrem dena lir ta mamangba tenzükder aser tamangertemji asenok? Asenok tangar mamangba purtem den medemdangdang, asenoki Tsüngrem tenzükba aser Tsüngrem dak amangba tepilaji kechi asütsü? Laishibaibo ashir, asenok den Tsüngrem adenbajibo talang nungia reprangtettsü aser aji angashir ajaki asenok bushia arutsü.

OLEMSABANG

Ni tarutsü Naga nunger tia ngua nüktsü yima zülur

M. Meren, Ex.Pastor Ungma

Naga nunger ya akidang nungi shinga küboka melidangba kin, British nunger küboka kin ishika aser mapang tatsüka dang lia alimelen agüja aru, saka India kübokbo lia maru, saka British nunger ochi mashi ajanga India nem amoka yutsür aoba agi tanü par kübok lia tanü tashi kangshiteper, saka asenok ya India nunger masü ta surubangru agia kuli agütsür. Aser par o asen na chiyungtsüa kenyongi balala aser akidang Yihuda nungeri Samaria nunger sembaba ama India nungeri Naga nungerji tesüngmangtsü sempa liasü, anungji par o asen-na kin mechitep aliba kin lir. Tamasayongi Naga kinji yimtsüng shiaji chuba yimli kaka ama pei yim sasep nung nüchiso tia nung lia aru aser yimtsüng shiaji küm tatazük nung pusu menden yanglur Democracy yimli nung nüpur madak yimsü yimli yanglua yimsü süa aru, saka chuba kati yimsü süa maru. Aser Naga nungerji tekong tenem nung perokshia aliba kin asüba ajanga British nungeri 1839 meta nungi yim kar tang agia par kübok yua aru aser 1877 nungibo British nungeri Kohima mesema alitsü tenzük, iba mapang nungjia Naga nunger o British nunger na tsüngta kecha tenangzüktepba zülua mayu. Assam nungerbo mezüngyongi chuba yimli yanglua lia aru iba mapang nung 1826 küm Treaty of Yandabo zülutep idangji British India kübok tashi anga lidi ta parnokbo nangzüktep. Iba tezülutepba jagi parnok nüchi tia bushitsü mesatem aküm. Saka Naga nungerbo tsüraburtemi iba tia nungji Naga nunger anioka meyütsüba ajanga tanü tashi Naga nunger temeden sadema lir.

British nungeribo Naga kinji tenem nung aliba kin aser parnokki kenyongi kin balaka ta angateta liasü, anungji British nunger Assam Governor Robert Reidi paibo Parliament nung yamai ashi, "Naga nungerji India nunger masü, Burma nungera masü, Hindu yimsü mesüra Buddhist yimsü mesüra Muslim yimsü amanga beshiba ama parnokki mebenshir oda parnok tamangbajia kenyongi balaka" anungji bendangertem temelaba mekai mashi mashi Naga limai manioktsüla ta angateter 1873 küm Eastern Frontiers Regulation Act 1873 nung renema perokshi yamaji asen Naga nungertem ya tetenzük nungi kin balaka ta ajiteta aruba kin lir, aser alima nung shinga kina merarar mali, azü metokshir kin mali, saka shinga kinia nisung kolak lepzüka bener aoba mali, saka Naga kinbo nisung tepsetbaji tekolak bener aotsüba atema nisungji aleper aser pei kidang teret takongji küm shia külema aru aser benjungbentsü mapang nung pai lepzükba teret takongtemji tekong nung azüker longsuteper, yamaji konang beshia aruba kin lir. Ano asen Naga kinji tsürabur nungi o ken jumbira aji kodanga meyazütsü aser aji yazürabang joko azü tokshitsü ta inyaka aruba kin lir, ano asen kin tsüraburtem ken o tarok jembia aser item o jagi ken mejema atenba aser lepzükben ken tarok mejema tentetba kin liasü. Naga kin ya tsürabur mapang nungi tarutsü Naga kin asoshi aroka bilema Naga kinji NÜCHI KIN ka akatsü nüngdak ta shisateta 1929 January 10 nung Simon Commission Kohima tonga arudang Naga nunger teshimtettem nisung 20-i memorandum ka onok Naga nungertem na arudang onok koda lia arua liasü, yamaji nai ozü lima toktsür aodang kasajisa toktsür oang ta zülur agütsüba angur.

Mapang-aben Naga nungeri nüchiso tia atema jembia arur kodang India Nüchi tia 1947 nung angu, iba mapang tekaratiba nung parnok Sorkar junga mekümtetdangsa British nungeri Naga nunger India ket nung yutsür aor ta angashia Naga nunger tia indang rasa ashitsü asoshi Naga nunger tanishir ishika Mahatma Gandhi den 19th July 1947 Bhangai colony New Delhi nung ajuruteper, aser Naga nunger indang yamai rasa ashi "Naga nungerji India nunger masü, aser Nagaland ya India litsü nung mali, aser Naga nungertem pei linük asoshi nisung kati metembang tashi raratsü" Idangji Gandhi yamai ashi, "Naga kinji Nüchiso kin ka asütsü temeden lir, anungji nenoki India telongjem nung metennüra nenokji shingaia mekangshitsü ta pai langzüba angur, saka Naga nungeri memoa pa yakta kaseta asüba yong Naga nunger atema aroka bilemstsür India P.M. tem rongnung kata mali akümer, saka jungaka mejungaka P.M. Nehru den ajuruteptsüsa ta ser 11 March 1952 nung Naga nunger teshimtet oa ajuruteper dangbo pai koma langzü repringang, "Anüng meküpzüka aruyonga aser India lima ajunga azü agi ayong küma ayimyonga Naga nunger nem Independence magütsütsü" ta langzüba angur. Saka asen Naga leniri yamai langzü "Onoki nenok dang Independence meshir masü saka ozü tetsü-tebu nungi nenok India nunger den melidang aser ozü limaji Independence lima ka lir, anungji ozü lima toktsür oang" ta langzüba angur. Anungji India den tetenzük nungi asenok tsüngta obang mapu aser lenji marutep atalokyonga aruba tanü tashi lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indonesia nung Arogoi tekülem temeden atema nokdak

Surabaya (Indonesia), March 25, 2023 (Agencies): Indonesia kübok West Java Province nung aliba Arogo kati tekülem sentong agitsü temeden atema tasü itta nokdakogo.

Muslim nungertemi March 19 (Amongnü) nungi tenzüka Khristantem dang tekülem sentong magitsü tuyur, ajisüaka Khristantemi ibaji anema nokdak, ta pastor-i metetdaksü.

Jakarta nungi mile 60 shi pilar aliba Purwakerta nung Muslim nunger ana Simalungun Protestant Christian Church (GKPS) Tenla ki telungi tua noksa aser video tangokba sülen Arogo züngsemtem dang senshiang ta ashi, ajisüaka pastor Rev. Julles Purba-i maneni tatem tashi tekülem sentong agia liasü.

Pastor-i, "Parnoki onok dang, tang nungibo nenoki yangi tekülem sentong magitsüla, kechiyong nenok nem temelaba agüja mali ta ashi," ta metetdaksü.

Tenla ki tasazükji metong nung metre 13 aser lenden nung metre 8 liasü, saka jara maliba ajanga süisüpongertemi Tenla kidang tekülem sentong agibaji ngua liasü, ajisüaka küm ana tejaklen Tenla kiji tanaben süshio, ta Pastor Julles-i metetdaksü.

"Tesüiba küm ana tsüngda onoki timtem kecha majurui liasü," ta pai ashi.

March 19 nüji nisung 60 shi Tenla kidang liasü; Tenla kidang Arogo züngsemtem den tanga jilatem nungi aruba nisung pongu liasü, ta pai ashi.

March 20 nü social media nung video ka prokshi, aser iba video nungji local citizen association nung tongti, Rukun Warga-i Khristantem dang, "Joko yangi tekülem sentoing magitsüla," ta ashir. Iba mapang nungji Arogo lenir kati pa dangji, nai sorkar ozüngtem meteta ali asü?, ta asüngdang.

Citizen association nung tongti lenir jagi Khristantem dang, 'Ni tekülem sentong tagidak mapang timtem magütsür, ta ashir; iba sülen lanur ka arua Khristantem dang, kiyongertem taginübaji nenoki akhümtsübutsüla," ta

ashir. Arogo lenir kati Muslim nungertem dangji, "Tekülem sentong nokdangertem atema ozüng ka lir, ibaji shidak südi? Nai-ibaji meteta lir. Tekülem sentong tagidak mapang nung timtem agütsürtem nem temerenshi agütsüsüla, ibaji shidak südi?" ta asüngdang.

Arogo lenir jagi association lenir dangji, "Sir, nai item temzüngji meteta lir asü? Tekülem sentong tagidak mapang timtem agütsürtem nem temerenshi agütsüsüla. Sorkar ketdangsertemi linük temzüng meteta lir asü? Nai ozüngji meteta lir? Anungji nai Tenla kidangi tua noksa tangokba sülen ibaji prokshitsü makok," ta ashi.

Khristan ka, Bobby Risakotta-i twitter ajanga iba video ji upload asü. Pai twitter ajanga, "Onok tekülem sentong nung yamai ataloker? Onoki hopta shia khen dang ki telung nung tekülem sentong agir aser public nem timtem magütsür. Iba ajanga ner yimsü nem timtem agütsür asü? Ozü ki ya mosque ka nungi metre 50 shi dang pilaa lir; anogo shia parnok ponguben sarasademba ni angashir, ajisüaka onoki malaker aser iba jagi onok nem timtem magütsür," ta ashi.

March 23 nungi Muslim nunger ita ka piyong sarasademba 'Ramadan' tenzüksü anogo ishika dang lia iba mangatettep ya adoka liasü.

Communion of Christian Churches (PGI) unit nung executive secretary, Rev. Henrek Lokra-i, "Yimlibilema GKPS Purwakerta Arogo atema sarasademjang, kechiyong yashi March 19, 2023 nü kari iba Arogo anema inyakogo," ta metetdaksü.

Indonesia nung Tenla ki yanglutsü atema temelaba angutsüji kanga tasak, ta meimchir temeden atema inyakertemi metetdaksü.

Indonesia nung Joint Ministerial Decree of 2006 (SKB)-i Tenla ki asütsü atema temelaba agütsür, ajisüaka Arogo tasen aikati Tenla ki asütsü atema temeden mangur.

Arogo tasentemi Tenla ki asütsü atema Arogo züngsem

90 sign nungdaker aser yimsü balala aliba area nung Arogo züngsem 60 indang sign nungdaker. Yamaji züngsem peria lia sign süaka ketdangsertemi metetsümonga temelaba menotsür mesüra magütsür.

Osangbener den jembidang Central Java Province kübok Magelang nungi Rev. Lukas Suntoro-i, Khristantem nem aiben timtem agütsür, anungji tekülem sentong agiba mapang nung police guards nungdaker, ta ashi.

"Tang nungibo tekülem tagidak mapang timtem agütsürtem nem ozüng kübok temerenshi agütsüsü," ta paisa metetdaksü.

Tang alima nung Khristantem alitsü linük tamajungtiba 50 rongnung Indonesia ya jenjang 33buba nung lir (Christian support organization Open Doors' 2023 World Watch List).

Indonesia nung nütsüng teimbaka Muslim nunger lir, aser linük nung mission mapa inyakba Arogotem anema Islamic kiralongrar teloktemi inyaker, ta Open Doors' WWL report ajanga metetdaksü.

"Arogo kati sayutsüngira aser Khrista osangtajung prokra kobi melii parnoki Islamic teloktem nungi timtem ajurur. Indonesia kübok region kar nungbo Arogotemi Tenla ki asütsü atema temelaba mangur aser sorkar ketdangsertemi documents ashishir," ta kasa report ajanga metetdaksü.

ANOGO ABEN TSÜNGREM DEN

Melangzüba Tasüngdangba T.Ken 77:7-10

Langzütsüba dang nungi asüngdangtsüba temelaba. Item tekongtem nung tasü mait nisung kati tasüngdangbatem asüngdangba angur. "Kibubai teti asoshi ni sentokdi ma? Pa taochi teti asoshi oadokogo ma? Pai nangzükba joko amajok asü? Pai ain adoka pai taochi shibangogo ma?" (t.7-9). Aser tatem nung yamai ashi, "Ya ni tashi maitba; saka tematiba teka tajichilen aliba mapang ni bilemtet" (t.10).

Kodang asenok timtem ajanga odir asenoki yimya agi tasüngdangbatem asüngdangba. Dawid sarasadem, "Kü Tsüngrem, kü Tsüngrem, kechiba nai ni sentoker?" (T.Ken 22:1). Yisüia kangki nungi iba o jemi (Matt. 27:46). Kodang asenoki timtem ajanga odir, asenoki Tsüngremi yaritsü aser kümzüksü imlar. Aser kodang kümzüksü atar asenoki maremsüker. Iba mapang nung tasüngdangba asüngdangba.

Tsüngrem dang ochi shia ashitsü tsübua teli. Pa dang ne tebilembatem shiang. Pai na anemsü mesüi ochi shia lidaktsüner. Saka ya bilemtetang: Khristan ama, asenoki rasaa ashiba nung masü; tenangzükbatem nung asenok alir. Tatishitsü agi, Tsüngremi iba tasüngdangba langzütsü tenzük. Kibubai teti asoshi sentoktsü asü? Masü. Pai ojang aochitsü asü? Atangji, Pai maongka sayutsü Pa taochi teti asoshi oatoker asü? Masü. Tsüngremi item tasüngdangbatem ajak langzüra balaka asütsü asü? Ne mulung tera süneptsü akok, saka tiajibo memelenshir. Tamang ajanga liang, tanguba agi masü. Kibuba tenangzükbatem nung amangang. Pai memelenshitsü.

Tsüngremi ne timtem nung tetibo ratetta mashitsü, saka Pai pa o tenangzükbatem agütsür. Na teimla makai tasü mait akümdang, sarasadem nung ne tasüngdangbatem Pa dangi bener arung, Pa o tenangzükbatem nung temulung lehang. Tsüngremi ne nungdaktem metet aser itemji agütsüsü.

Rome nung 'Christian Martyrs' memorial tasen ka lapokogo



March 23, 2023 nü Rome kübok Tiber asetkong nung aliba St. Bartholomew Basilica nung sentong ka ayongzüka Aso 20buba aser Aso 21buba naprongla nung Khrista atema asürtem bilemtettsü asoshi memorial tasen meshiteta lapokba mapang tangokba noksa nung angur.

Rome, March 25, 2023 (Agencies): Rome nung aliba Church of St Bartholomew nung Yisu Khrista atema asürtem bilemtettsü atema memorial tasen ka lapokogo.

2002 küm St. John Paul II-i, Rome kübok Tiber asetkong nung aliba St. Bartholomew Tenla ki ya Aso 20buba nung Khrista atema asürtem memorial tasenba lir, ta agizüka liasü. Iba sülen mapang tatsüka

dang lirbo Italy sorkari Tenla ki telung nungji ali tua bushisüngdangba mapang nung Aso 3buba nung aliba tekülem ki ka angu.

Sant'Egidio nung alirtemi iba Tenla ki aser memorial ji anepalur aser parnoki March 23, 2023 nü sentong ka ayongzüka Aso 20buba aser Aso 21buba naprongla nung Khrista atema asürtem atema museum aser memorial meshiteta liasü.

Rome nung aliba Arogo den alima tesem balala nung aliba Khristantemi St. Romero's feast day anogomong nung Nazi party, communist, totalitarian aser Khrista anemertemi reshikangshia tepsetba Khristantem bilemtetter. Church of St Bartholomew nung aliba memorial tasenba nungji Khrista atema asür Catholic, Orthodox, Anglican aser Protestant Khristantem bilemtettsü.

Tepela Lemsateper

Jalukie Town Ao Baptist Arogo ajanga arogo quarter aser office yangluba mapang arogopur aser adianu temeimertem kwikati arogo meima Tsüngrem tenüng nung nebu, shisatsü, rongsen aser sarasadem agi yaritepogo, arogo tenüng nung nenok ajak dang pelaba lemsateper. Nenok tenla tulu ajanga mapa takok ngua tempangtetogo. Nenok mapa tajung asoshi arogoi kanga pelar. Teyanglur Tsüngremi nenok taküm aser kibongtem ajak moajangma ta arogoi sarasademtsür.

Sd/-
T. Yanger Imchen
Pastor, JTABA.

Sd/-
Alemwati Longchar
Secretary, JTABA.

**AO OSHI ANGAZÜKDAK:
TANÜ ANGAZÜKTSÜBA OJANG**



Pezü

(n) züingdangba pezübuba (four)
* Ozü kibong nung tanur pezü lir.

Pezü

(n) temang shilem ka nung tetsü nungdena yur marakzüktet akümba (cramps)
* Menden tatsü nung amenba agi tetsüing pezü pezüa aküm.

OLONG PAITEP # 6467

	1	2					3
4							
5							6
7							8
9	10			11		12	13
14			15				
	16						

TIPIEN

- Ajem-ajemer - (9)
- Kanga tapet - (7)
- Tsüngküm ozü ka - (3)
- Tzünglu tongdangba - (6)
- Anüing nung tsükba - (3)
- Anüing nung yimzüba - (3)
- Lenmang süitepdak - (6)
- Anüingdang tesangwa - (3)
- Shisatsü tamajung - (7)
- Tiyazü jembia tangar ashioktsüba - (9)

LANGTSÜNGLEN

- An-i akoba - (5)
- Aonsotsü tashi ka - (5)
- Temolungjang nung miima meyu-i ashi - (4)
- Kunemkushi / Jakla ait - (5)
- Nisunger yimya / inyaksangshi - (5)
- Mali - (4)

OLONG PAITEP # 6466 TELANGZÜBA

TIPIEN :

- Tesangra, 5. Mungo, 7. Kisen, 8. Salem, 12. Semki, 14. Kilem, 15. Kensü, 16. Sangpang.

LANGTSÜNGLEN :

- Temesen, 2. Raksa, 3. Aon, 4. Aso, 6. Nile, 9. Alizüing, 10. Omen, 11. Lemta, 13. Ola, 14. Kin.

NAI-A YA METETTER MA



Alima nung teptsü teimtiba pei mang nung tepa aliba nisungji Lucky Diamond Rich lir. Pa temang ajungaji sünga teptsü tepa lir. Pai iba nungji 'Guinness world record' dena ngutetogo. Pa ya yimdong nung kechisarena sayua jajaba nisung aser international arts festival performer ka lir; paisa noklang nok dena meyoka sayur. New Zealand nunger Rich ya 1971 küm aso.

Noksa nung meputepi aliba 12 bushiang



Guwahati nungi Itanagar tashi Bharat Gaurav Train tenzüksüogo



Guwahati, March 25, 2023

(Agencies): Hokolbarnü Guwahati nungi Arunachal Pradesh kübok Naharlagun tashi Bharat Gaurav Train "North East Discovery: Beyond Guwahati" tenzüksüogo.

Iba train ya North-eastern state tem semdanga senziir aser March 23 nü Guwahati Station tonga aru. Bharat Gaurav Train

ya March 21 nü Delhi kübok Safdarjung station nungi apuso.

Arunachal Pradesh Chief Minister Pema Khandu aser Union Minister of State for Railways, Coal and Mines Rao Saheb Patil Danve nati train apusoa yok, ta Honibarnü sangdong ka nung metetdaksü.

Guwahati railway station nung flagging-off ceremony

nung NF Railway General Manager Anshul Gupta aser railway ketdangsür tejentem aden.

Bharat Gaurav Train nung aruba tourists-i Kamakhya Temple semdang aser iba sülen Umananda Temple aser Brahmaputra nung sunset cruise süogo.

Guwahati dak alia iba train-i anogo 15 tsüingda Assam nung Sivasagar, Furkating aser Kaziranga, Tripura nung Unakoti, Agartala aser Udaipur, Nagaland nung Dimapur aser Kohima aser Meghalaya nung Shillong aser Cherrapunji semdangtsü.

Bharat Gaurav ya northeast state tem atema mezüngbuba tourism special train lir aser India sorkar indang "Ek Bharat Shrestha Bharat" aser "Dekho Apna Desh" den putepa lir ta Railways-i sangdong nungsa metetdaksüogo.

G20 teshimtet nübotemi Arunachal yimtiba Itanagar semdang

Itanagar, March 25, 2023

(Agencies): Arunachal Pradesh yimtiba Itanagar nung G20 senden nung shilem agitsü atema ainertem aruogo.

G20 member countries, guest countries aser international organizations nungi teshimtet nübotem Honibarnü Itanagar-i aru.

Itanagar nung aliba Donyi Polo Airport nung sobaliba yartsüingsangertem aser Arunachal Pradesh sorkar ketdangsürtemi ainertem pelaa agizük.

Parnok ya Itanagar nung anogo ananü Research and Innovation Initiative Gathering (RIIG) indang G20 senden nung

adentsü atema aruba lir.

Golden Jubilee Banquet Hall nung parnoki sobaliba sentong ka nung adentsü aser Itanagar Gompa and JN State Museum semdangtsü.

"Onoki G20 Group senden atema yongyar. Iba ya Arunachal Pradesh atema otsütsüsü mapang ka lir aser iba ajanga 'Sarvashresth Bharat' alizüing atongtsü" ta Chief Minister Pema Khandu-i ashi.

G20 senden nung 'One Earth, One Family, One Future' bangzüing tali akangshitsü. Teshaimtet nübotemi alima tajungba akümsü atema research aser innovation indang onüktem

lemsateptsü, ta Khandu-isa ashi.

"G20 teshimtet nübo ajak Itanagar-i pelashishia agizük. Iba ya onok asoshi maongka tulu ka lir aser nenok aruba atema kanga pelar. Asenok ajak longjemer alima tayongzükbatem atema inyakdi" ta Arunachal Assembly Speaker Pasang Dorjee Sona-ia ashi.

"G20 Summit indang Research Innovation Initiative Gathering (RIIG) nung adenertem dang Arunachal Pradesh-i sobaliba takar, handlooms & handicrafts and scientific innovations sayutsü" ta Deputy Chief Minister Chowna Mein-ia metetdaksü.

Tanü Guwahati nung Section 144 ozüing benoker

Guwahati, March 25, 2023

(Agencies): March 26, 2023 Deobarnü Assam Public Service Commission (APSC) Combined Competitive Preliminary Examination agitsü atema Guwahati nung CrPC (Code of Criminal Procedure) indang Section 144 kübok tenokdangba agütsüogo.

APSC indang CC tatidang tiptema agitsü atema tenokdangbatem agütsür ta Assam Police-i ashi.

"Ozüing alema

inyaksangshirtemi examination centres telung aser temeket nung tim masüba mapa inyaksü akok, aser iba ajanga tetsükdaksü, timtem mesüra nisung yiruyibong asütsü akok, mesüra meimchir taküm asoshi lendong mesüra public petsaprong tensa ajurutsü akok" ta Guwahati police-i sangdong ka nung metetdaksü.

"Iba nung ajemdaker Police Commissionerate, Guwahati kübok Police districts asem nung exam centres nung

tenokdangba agütsüsü lemtet" ta parnokisa ashi.

Guwahati police-i tetuyuba agütsüba nung examination Centres anasa aser examination Centres meketa 100 meters telongtet nung nisung 5 tema adenshitsu memelar.

Tashi mangartemi ozüing tapet agi merenshitsu aser tatidang agütsürtemi ketdangsürtem den amaliteptsü aser inyakyim sülen anidaksü metetdaksür, ta police-isa ashi.



Union Minister of Ports, Shipping & Waterways and Ayush, Sarbananda Sonowal-i Dibrugarh nung Uddipana Award sentong nung adendang agiba noksa angur. Sonowal Kachari Youth Festival & Cultural Festival nung Sarbananda Sonowal-i tongti tesemdang ka ama shilem agi aser pai Sonowal Kachari indang sobaliba akaba jembia. 2047 küm tashi nung India ya atmanirbhar linük ka kümdaktsüsü alizüing asoshi Sonowal Kachari lanurtem asoshi sabang tajung agütsüba atema iba sentong ayonger dang pelar ta Sarbananda-isa ashi. (Dibrugarh, March 25)

US-i Myanmar military nem ano tenokdangba talila agütsü

Yangon, Metsüremi/March 25 (Agencies): United States-i tawa Myanmar military nem tenokdangba agütsüba ya linük armed force atema tayimtsü totzü supply asüba dak rangloker agütsüogo.

US Treasury Department-i Hokobarnü ashiba agi, parnoki Myanmar indang military den sendaktepa aliba nisung ana aser entities trok nem tenokdangba agütsüogo, shirnoki military-i maneni tashiyim amshia yimsü asütsü atema teyari agütsür.

Tenokdangba agütsüba company asem ya Myanmar indang defence sector nung linük armed force tem nem aviation fuel belener arutsüba, rizünga toktsüba aser lemshiba dak sendaka lir, ta US Treasury-i ashi.

Tenokdangba agütsüba company tem rongnung Sia Sun Group densema lir, koba taoba mapang Canada aser European Union-ia tenokdangba agütsüogo. Tanabuba nung Asia Sun Trading Co Ltd densema lir, iba firm nem taküm küm tetenzüklen UK-i tenokdangba agütsüogo. Tasembuba nung Cargo Link Petroleum Logistics Co Ltd densema lir. Iba firm yagi Myanmar ajunga nung military nem tayimtsü totzü lemstür aser parnok nem UK-i taküm küm tetenzüklen tenokdangba agütsüogo, ta Treasury-i ashi.

Kasa mapang nung Tun Min Latt aser Tun Min Latt kinungtsü, Win Min Soe na nema tenokdangba agütsüogo. Treasury-i ashiba agi Tun Min Latt ya military lenirtem den

kanga junga sendaktepa lir aser Win Min Soe ya pa kinungbo den külemi Star Sapphire group of companies, Star Sapphire Trading Company Ltd, aser Singapore-based Star Sapphire Group PTE Ltd ta company asem kibur lir.

Tena indang company yagi drone aser tayimtsü part tem densema military indang hadirtem benelener arutsür aser China indang arms manufacturer Norinco indang agent ama inyakogo, koba US-i tenokdangba agütsür lir, ta Treasury-i ashi. Tun Min Latt ya taoba küm September ita temesepba mozü shibelenba aser senotsü ochi meshi amshiba atema Thailand nung pua liasü, ta kasa sangdong ajanga metetdaksü.

"Burma indang military yimsüsürtemi par nübürtem nem maneni timtem tekangshi bener arutsü," ta Treasury Under Secretary for Terrorism and Financial Intelligence Brian Nelson-i ashi.

2021 küm sorkar atsünga sülen military-i tyayimtsü amshia civilian tem aliba tesemtem aiben maka arudar.

"Parnoki tayimtsü amshia tesem balala amakba nung 2022 küm central Burma kübok Let Yet Kone yimtsüng maka school ka nung kaketsür aser tesayurtemdak kongshiba aser Kachin state nung kentenba sentong ka nung shilem agia aliba mapang nisung 80 tepsetba densema lir," ta Treasury-i ashi.

Hokolbarnü tenokdangba agütsüba sangdongba ya linük military yimsüsürtem den

sendaka aliba nisung aser firm tem nem US-i tesüsabuba tenokdangba agütsüba lir. EU aser UK-ia, military sorkar ya lokti nungi pila lidaktsütsü atema tenokdangba balala agüja arudar.

Washington-i tayimtsü totzü supply dak rangloker inyakba aser military yimsüsüba den sendaka aliba nisung aser company tem nem tenokdangba agütsüba ya Justice for Myanmar activist group aser The Sentry organization-i pelashishia agizükogo.

"US-i military nem tenokdangba agütsüba ya onoki pelashishia agizüker aser European Union, United Kingdom, Canada aser Australia densema mulung ajemertem danga military nem teyari agütsüba company aser nisung ajak nem tenokdangba agütsütsü ayongzükler," ta lokti tentet ana yagi külem sangdong ka ajanga metetdaksü.

Taoba ita EU-i nisung 16 indang rongsentem tamshi mejungi kümdaktsü aser senzusenpongtsü atema tenokdangba agüja liasü. Tenokdangba agütsürtem rongnung energy minister, tongtibang shishilembartem aser temaba jenjang nung aliba ketdangsurtem densema liasü.

EU-isa, military-i mimchir temeden anema inyaksangshiba aitsüogo, kong tetsürtemdak tashiyim benshiba, lokti tentet balala nung inyakertem, human rights activist tem, osangbenertem reshikangshiba aser school aser mozüki densema civilian infrastructure tem tayimtsü amshia amakba densema lir.

France-i TikTok, Twitter, Instagram nokdang

Paris, Metsüremi/March 25 (Agencies): France-i sorkar tenzükertem phone nung südoksenemtsü atema TikTok, Twitter, Instagram aser tanga app tem amshiba tenokdangba agütsüogo, kechiyong item app tem nung data security atema jenjang peria agia mali.

Iba tenokdangba ya osang agütsüba mapang nungi benoka inyaksangshitsü, ta Ministry of Public Sector Transformation & Civil Service-i tweet asü.

"Sorkar administrations aser civil servant tem cybersecurity atema sorkari TikTok amala recreational application tem civil servant tem indang jurila phone tem nung mamshidaktsütsü atema telemtetba agiogo," ta Stanislas Guerini-i Hokolbarnü ashi.

Paisa, hopta ishika tsünga Europe aser tanga tesemtem nung France den sendaktepa aliba linüktemi China meyong iba video-sharing app TikTok ya download süa install sür mamshitsü atema tenokdangba agütsüogo, ta ashi.

Guerini-i, iba recreational applications ya administrations' equipment nung amshitsüsa cybersecurity aser data kümszüka ayutsü atema jenjang tapet agia mali ta ashiba den mapa atema amshitsü asoshibo tenokdangba agintsütsü akok, ta shisem.

Hopta ishika tsünga sorkar aser institution temi TikTok nokdangogo, kong White House, UK parliament, Dutch aser Belgian administrations, New Zealand parliament, and Canada, India, Pakistan, Taiwan aser Jordan sorkar densema lir.

TikTok amshiba ajanga lendong bener arutsütsü ana nung aliba ya US nung ozüng yagurtem aser national security ketdangsurtemi kanga süoki ia bilema benokogo. Parnoki ashiba agi, iba app-i bendenba data ya China sorkari mela mela agizüka amshitetsü akok.

Taoba ita European Union kübok policy yangluba institution tulutiba ana; Commission aser

Council-i cybersecurity dak sendakba nung staff tem indang phone nung TikTok mamshitsü atema tenokdangba agütsü.

TikTok indang Chinese parent company ByteDance ajanga China sorkari tamshirtem indang location aser contact data agizüka amshitetsü akok ta shisabulua bilemba alima ajunga nung tali aküm.

Company indang CEO, Shou Zi Chew-i, TikTok mesüra ByteDance ya China sorkar indang hadir ka masü ta ashiba den, ByteDance company shilem 60 bo global institutional investors tem meyong lir, ta shisem.

China nung 2017 küm yangluba ozüng ka ajanga linük national security dak sendakba nung company temi sorkar nem personal data mashi ka agütsütsüla ta shia lir. Tang tashi nung TikTok-i iba amala data agüja ali mali aji mejangja, saka iba app ajanga tamshirtem data aika bendenba ajanga shisabulua bilemer.

Menungra Bilemteter



Asür Rongsenyanger Jamir (Longsa)
25.09.1986 - 26.03.2022

Mapang ka nungbo ki bushia arutsü amai aser ano akümlir rongnung densema ali amai yongyaseta ataa liasü, saka ya asangsang Rongsenba Kibuba dangi teti anisungzükdaki orr onok den medensem küm ka ajunger. Kanga menungrar neh !

Tsürabur, nenu nunger, kinunger aser medemertem ajaki nü mapa tajung teti bilemteter aser kodanga mamatsü.

MULUNGNEN O



02.05.1950 - 17.03.2023

Ozü temeim kinungtsü aser tsürabur **TEKALEMLA** (Khar) Aoyimkü, ajungbena iba lima nungi pilar onok mangyim jashi timtem tia nung alidang sarasadem, nübo aser rongsen agi yariteper kija-kibong, arogo, lokti tentet, kidang-kiyonger, tembar-medemer aser temeimertem ajak den onok mulungjang ajak agi pelaba mulungnen o ka yangi lemsateper.

Onoki yangi teyaritepertem tenüngteta pelaba meshiteta atema sasar saka Tulusang Tsüngremi nenok ajak moajangma ta onoki sarasademtsür.

- Temeim kinungbo, Chimur aser Kinungertem.



OFFICE OF THE
NIHOTO AO BAPTIST FELLOWSHIP
Dimapur - 797112 : Nagaland

Omen : "Lemang Ataraji" Yohar 14:6

NIHOTO AO BAPTIST FELLOWSHIP.
NIHOTO NUNG AOER ALI KIMONG KIBUR AJAK DANG MEPIA SANGDONGER.

Khrista nung temeim adianu ajak dangi temeim salem. Nihoto Ao Baptist Fellowship tentetaka tekulem sentep agitsu kimong aser ki makai arur. Fellowship asoshi tekulem ki ka nungdak ta ajiteta Nihoto nung Aoertem sudak alirtem aser temulonger temi tenla tulu bendena kimong ka aliogo. Ali kimong alitetaka Tekulem ki yanglutsu khuret tulu lir. Tekartiba nung tekulem ki yanglur tiptema Tsüngrem kulemtsu sarasadema inyakdagi.

Nihoto nung asenok aoer ali kimong kiburtem aika dang lir saka tang ki sua alirtembo ishika dang. Ashiba ama tang sudak alir ishika aser tangar temulongertemi tenla bendena ali kimongbo aliogo saka adianutem ki meyanguka shirnoksa ali alia kar nenok shilem teyari medeniang iba tenla ki meyangulettsu. Anungji, shirnoksa tang ki yanglua meliaka ali kimong alia kar, nenokia asen Fellowship ki yangluba nung shilem agia nungita yartiteper nung temoatsu asutsu aser mapa takok ngutettsu ta tamang akar. Nenok ajak dangi tsungdongi maruteter saka iba osang kakat ajanga dang Nihoto nung ali kibur aoertem kija aser kibong ajak den iba khuret sarasadema sangdonger.

Sd/-
Azungla Jamir
Fellowship In-Charge
8119968296

Sd/-
Tinuwangshi Jamir
Committee Convenor
9612160504

~ SANGDONGER ~

First Bloom School Tuli nung Montessori Teacher's Training küm ka agütsür (25th May 2023 to March 2024) Indian Montessori Centre Kolkata fungsi certificate agütsütsü.

Detail information asoshi
iba contact no. 8729995856 nung agitsü akok.

Miami Open: Bianca & Sabalenka nati takok angu; Jabeur tsükogo



Metsüremi/March 25, 2023

(Agencies): Fourth seed asayar Ons Jabeur-i Miami Open nung mezüngbuba asaya nung Russia tsür qualifier Varvara Gracheva 6-2, 6-2 agi mekoki asayamung nungi tuguogo.

Tetsür kija asaya nungsa Canada tsür aser taoba US Open champion Bianca Andreescu shiba tang jenjang 31buba nung lir lai Greece tsür seventh seed asayar Maria Sakkari 5-7, 6-3, 6-4 agi kokogo. Tena tsünga ghonda asem ser minute asem asaya liasü.

Romania tsür Sorana Cirstea-ia world number four asayar Caroline Garcia 6-2, 6-3 agi kokogo. Taoba hopta Indian Wells asayamung nunga Cirstea-i Garcia koker liasü.

Ajisüaka world number two asayar Aryna Sabalenka temang nung timtem laika lai 6-4, 6-3 agi America tsür Shelby

Rogers kokogo.

Tunisian tsür Jabeur, shibai taoba küm Wimbledon aser US Open final tonga asayaogo, la yiru mapang tatsüka masayai lir taoba hopta Indian Wells nung asaya ajisüaka la tasembuba round nung tsükatok.

Australian Open asayaba mapang la temekok yiruba sülen surgery agi aser ibayongji Middle East nung asayaba WTA Tour nung masayatet.

Iba asayamung nunga lai junga masayatet aser Gracheva den asayaba mapang anaben tashi temag anepalutsüsa aküm.

Gracheva atema Jabeur akokba ya tang tashi nung takok tulutiba asütsü, shiba iba ita tetenzüklen Austin nung mezüngbuba WTA final tongteta asaya ajisüaka Ukraine tsür Marta Kostyuk mekoki liasü.

Kasa mapang nung 2019 küm US Open koker alila Andreescu shibai taoba round

nung Britina tsür Emma Raducanu koker liasü lai Sakkari den asayaba mapang mezüngbuba round bo makok ajisüaka lai ball kanga süngjema agizük tenzük aser iba den mapang shia winner nguteta tanabuba set azüok.

Tasembuba round nung lai Sakkari-i seblasebshia asayaba maongka agi, ajisüaka tatem nung match point ana anguba magitet aser iba ajanga la indang opponent nem timla agitsü, saka Greek tsür la yagi net nung ball zükloksüba sülen lai asaya akok.

Taoba küm April ita nungi asaya tenzükshiba sülen Andreescu-i top 10 nung aliba asayar asembuba kokogo.

Kasa asayamung nung Czech Republic tsür Karolina Pliskova-i China tsür Wang Xinyu 6-2, 6-4 agi kokogo aser Barbora Krejčíková-i Belarus tsür Aliaksandra Sasnovic 6-3, 6-2 agi koka liasü.

Bayern Munich-i caoch Julian mapa nungi anentsür Tuchel shim

Metsüremi/March 25, 2023


(Agencies): Julian Nagelsmann coach mapa nungi anentsüba sülen Bayern Munich-i Hokolbarnü sangdong ka ajanga taoba Chelsea aser Paris Saint-Germain coach Thomas Tuchel shimba sangdongogo.

Nagelsmann lenisüba nung Bayern pur Champions League quarter-finals tongogo aser parnok taruba ita Premier League champions Manchester City den asayatsü.

Ajisüaka Bayern pur Bundesliga nung taküm parnoki amkbanger asayanüba ama masayateti arudar aser ibayongji Nagelsmann ya arishi küm 49 tain Tuchel-i melenogo, shiba lenisüba nung Chelsea puri 2021 küm Champions League kokogo.

Bayern Munich-i sangdong ka ajanga ashiba agi, "FC Bayern aser head coach Julian Nagelsmann na pilaogo... Nagelsmann ya Thomas Tuchel-i melentsü."

Bayern-isa, Tuchel den 2025 küm June ita tashi tenangzüktepba yangluogo aser pa Hombarnü nungi mapa tenzüksü, ta ashi.



Thomas Tuchel

Bayern mendenbuba Oliver Kahn-i, "ni aser FC Bayern tenüng nung Julian aser pa indang coaching team dang kanga pelar aser tarutsü nung takok nguyonga aotsü imlaja atar," ta ashi.

Bayern-i küm ana tejakdang Nagelsmann den küm pongu atema tenangzüktepba ka yanglu, saka Bundesliga nung parnok temaba jenjang nung timtema arudar.

Parnok tang league table nung taoba mapang Tuchel inyaka aliba Borussia Dortmund sülen tanabuba jenjang nung lir.

Tuchel, shiba Bayern-i taoba mapanga alizüksü merangogo, pa September ita Chelsea

toktsüba sülen mapa balala nung inyaka liasü.

Pa lenisüba nung Bayern pur mezüngbuba asaya Apri 1 nü Dortmund den asayatsü. PSG-i mao tsünga Tuchel lenisüba nung Dortmund pur 2015 nungi 2017 tashi asaya liasü.

Bayern puri Champions League round of 16 nung PSG pur tsükdaktsüogo, ajisüaka Deobarnü Bayer Leverkusen goal 2-1 agi makokba ajanga league nung parnok kanga akoksaogo.

League nung asaya teku dang asayatsü anunga lir Nagelsmann-ia Dortmund den asaya ya kechi südir süaka akoktsüla ta shiogo, ajisüaka iba asaya nung pa bo shilem magitettsü.

Tuchel lenisüba nung Chelsea puri 2021 küm Porto nung Manchester City 1-0 koka Champions League akok, ajisüaka iba season tenzükler mapang tatsüka dang lir pa ya English manager Graham Potter-i melena liasü.

Tuchel ya taoba hopta ishika tsünga Munich nung rüshioogo aser pai Bayern coach mapa belenzüksü akok ta ajaki bilema liasü.

1st ODI: New Zealand-i run 198 agi Sri Lanka kokogo

New Delhi, Metsüremi/March 25 (Agencies): Honibarnü Auckland nung New Zealand aser Sri Lanka na tsünga mezüngbuba one-day international asaya New Zealand-i run 198 agi kokogo. Iba asaya nung Henry Shipley-i run 31 agi wicket 5 agia liasü.

Asaya akoktsü atema run 275 arishiba mapang Sri Lanka pur over 20buba nung run 76 dang yanglur asayar ajak out süatok.

Sri Lanka nung batter aseme dang rur ter tema yangluteta liasü. Mezüng bat asütsü atema maongka agi wicket 5 agia kokogo. Sri Lanka team-i over tembangtsü ball asem anunga lia asayar ajak out ser run 274 yanglua liasü.

Parnok rongnungi batter pongui run 25 dak tema yanglu aser New Zealand team nungi opener Finn Allen-i (51) run timtiba yanglua liasü.

Daryl Mitchell-i run 47, Glenn Phillips-i run 39 aser Rachin Ravindra-ia run 49 dang yanglur tesasatsüka out süatok. Pai run ka agi dang one-day international asaya nung mezüngbuba half-century

meyangluteti liasü.

Sri Lanka nung bowler tem rongnungi Chamika Karunaratne-i run 43 agi wicket 4 agia pai tajungba asayateta liasü.

Küm ana sülen mezüngbuba ODI asayaba mapang taoba captain Angelo Mathews atema par team asüngsashitsü asoshi khuret tulu benloksü, kechiyong opener anaprongla mezüngbuba over pezü tsünga out süadok.

Asaya nung Shipley-i NZ atema ball kanga junga ona Sri Lanka pur over 10 nung run 31 yanglur asaya pongu out süadoker liasü.

Arishi küm 26 tain asayar yagi Charith Asalanka aser Sri Lanka captain Dasun Sanaka na atonga out sütsü saka Karunaratne-i pai aonba ball nokdangteta pa nem hat-trick magütsü.

Kasa mapang nung Mathews-i run 18 yanglur aliba mapang pa Blair Tickner-i out süja liasü. Sri Lanka nung rongnungi Mathews-i run timtiba yanglua liasü.

Team ana tsünga ODI asem asayatsü aliba nungi tanabuba ya Christchurch nung Mongolbarnü asayatsü.

WBC: Nitu Ghanghas world champion kümogo

New Delhi, Metsüremi/March 25 (Agencies): India tsürtem rongnungi boxer Nitu Ghanghas-i Honibarnü tang linük yimtiba nung asaya aliba Women's World Boxing Championships nung 48kg weight category koka world champion kümogo.

Arishi küm 22 tain asayar yagi final nung Mongolia tsür Lutsaikhan Altansetseg koka gold medal nguogo. Iba asaya Nitu-i amokbanger asaya aser lai 5-0 agi asaya ayong ayonga koka liasü.

Iba asaya akokba sülen Nitu ya India nung asayatem rongnungi world championship

gold anguba asayar trokbuba kümogo.

Nitu-i tetenzük nungi kanga yakyaka asaya tenzük aser tasa balala amshia asaya-a iba takok nguteta liasü.

India-i tang tashi nung Women's World Boxing Championships nung gold medal 11buba nguogo, kong MC Mary Kom-i gold medal trok anguba densema lir.

Mary Kom (2002, 2005, 2006, 2008, 2010 and 2018), Sarita Devi (2006), Jenny RL (2006), Lekha KC (2006) aser Nikhat Zareen (2022) nungeri tang tashi nung gold medal ngur lir.

Smart City ajanga smart citizens... (Tapak 1 nungi...)

Mapatong 32 nungi 20 renemogo, 6 tatemleni arudar aser 6 taküm küm tatemlen tashi nung renemtsü imlar, ta Theunuo-isa metetdaksü.

Tang tashi nung Integrated Command & Control Centre (ICCC), Capital Cultural Hall, Kohima town beautification, safe and accessible pedestrian footpath, upgradation & rejuvenation of the community amenities aser Old Medical Directorate & NST nung Multi-level car parking mapatongtem lir, ta paisa ashi.

Tang teinyakdak mapatongtemji Kohima Local ground, redevelopment of WWII Battle tank area & Kohima City Centre lir ta paisa shisem.

Smart City Mission ya Prime Minister Narendra Modi-i June 25, 2015 nung tenzükja liasü.

2016 küm 100 smart cities rongnung Kohima shimtet aser Companies Act 2013 nung Kohima Smart City Development Ltd. (KSCDL) ama züngok. Iba sülen March 24, 2017 nü Company indang SPV amenoka liasü.

BILEMDANGANG

"Takok angutsü atema pungmanga makazüi inyakang."